

李文忠公全書

奏稿

李忠節公奏議卷三

奏病體增劇懇請開缺摺

光緒十二年正月二十八日

奏爲

微臣

病體增劇重任難勝籲懇

天恩俯准開缺回籍調理

恭摺仰祈

聖鑒事竊臣素有肝陽上沖之証每遇焦勞過度即

時觸發自光緒十年冬間奉

命前赴龍州辦理後路事宜時值

軍書旁午昕夕不遑加以水土惡劣異常遂致時愈時發猶可勉

强支持上年十一月十八日會同勘界大臣鄧承修進駐南關商

辦界務會議數次莫展一籌迭經會同電

奏陳明正當焦灼之

深復感烟瘴之毒牽引舊疾時發不止入春以來愈形委頓披閱

公牘即覺頭昏氣逆力難支撐據醫者云肝燥血虛非得靜心調

養難望速痊伏思臣受 恩深重當此邊局未定何敢自惜其身
惟恐無補時艱負疚滋甚現幸鄧承修經理界務諸臻妥協督臣
張之洞兼轄統籌盡心補救提臣蘇元春督辦邊防布置裕如舉
凡中外及地方一切要務斷不致稍有貽誤惟有仰懇 天恩准
臣開缺回籍調理一俟病體漸愈即當趨覲 慈顏求 賞差使
不敢稍耽安逸自外 生成廣西巡撫員缺緊要請 飭令撫臣
張曜迅速赴任至臣本任藩司員缺並祈 簡放以重職守所有
微臣積受烟瘴觸發舊疾萬難支持據實陳請開缺調理緣由理
合恭摺具 奏伏乞 皇太后 皇上聖鑒訓示謹 奏 光緒
十二年四月二十六日奉 旨著賞假一個月毋庸開缺欽此

奏遵辦裁營節餉抽調綠營訓練摺

光緒十二年二月初六日

奏爲迭次欽奉

諭旨飭令裁營節餉先經兩次覆陳尙有未盡

事宜續行詳晰具奏恭摺仰祈

聖鑒事竊臣於龍州防次承准

軍機大臣字寄光緒十一年八月二十七日奉

上諭各省勇營

糜費甚鉅已欽奉

懿旨令各將軍督撫汰弱留強核實辦理惟

向來撤勇一事流弊滋多不可不謀之於豫且此次撤勇固貴節

省餉項移作要需尤在整飭營規練成勁旅各省勇營虛伍已成

通病其始勇丁遇有事故從緩募補將截曠銀兩中飽久之竟有

初招時已短數成者統領派員點驗則移東補西以掩一時耳目

冒餉尅扣百弊叢生此等情形朝廷早有所聞姑不追咎既往現

當歸併之始必應嚴申禁令倘仍有虛伍之弊即以軍法從事並著將如何歸併之處先行切實陳明不得稍涉含混勇數既裁營員自隨之而減如實有久經戰陣之員月給薪糧作爲額外留於該省差委仍酌予限制此亦儲備將才之一策全在各統領激發天良秉公遴選設又藉此肥己或安置私人或浮開公費一經查出立予重懲至遣撤勇丁如竟任其所之散而無稽老弱流離可憫驕悍生事堪虞必須先事綢繆詳加規畫其無欠餉可領者酌予川資遴派委員分起分路管帶回籍庶於約束之中寓體恤之意以上數條該將軍督撫均當悉心體會認真經理此外如尚有未盡事宜各抒所見奏明請旨並將新招之勇與舊有之勇如何

裁汰如何整頓實存現勇若干節省餉銀若干明晰聲叙經此次訓飭之後其各痛戒瞻徇破除積習務使裁撤之營安靜無事存留之勇訓練益精方爲不負委任至各省綠營宜如何變計操演或仿直隸練軍章程或照各該省原有抽練章程一體舉辦並著於撤勇時一併妥籌具奏將此由五百里各諭令知之欽此即遵旨寄信前來臣跪誦之餘仰見 皇太后 皇上明見萬里洞

燭無遺務爲久遠之規不憚再三之戒如臣禱昧莫報涓埃敢不仰體 宵旰之憂勤以冀勉圖補救於萬一伏查上年奉到七月初五日 上諭籌辦邊防如何添設提鎮專官確覈兵勇營數經與兩廣督臣往復函商由張之洞主稿會銜具奏又欽奉九月初

九日 皇太后懿旨飭令裁減兵勇以節餉需亦經臣欽遵切實辦理由驛具奏在案臣維各省勇營虛伍通病早在 聖明洞鑒之中仰沐 矜全不咎既往若再不知感奮何以昭 國紀而副

皇仁當與提臣蘇元春嚴申軍律通行將領宣布各軍責令激發天良毋任因循玩法邊防各軍前經奏明先裁八營後即已汰弱留強充補足額其遣撤之勇業與提臣詳加規畫如無欠餉可領者無不酌予川資遴派員弁管帶回籍並無老弱流離驕悍生事至若久經戰陣之員月給薪糧作爲額外留省差委誠如 聖諭亦儲備將才之一策應俟裁定營勇後與提臣秉公遴選期收實效仍酌定名數隨後奏陳斷不敢安置私人浮開公費同干咎

戾又查廣西綠營兵丁前於光緒六年經升任撫臣張樹聲籌議參酌直隸練兵章程就省標抽練二營提標抽練二營左右兩江鎮標各抽練一營合三千人酌加練餉立營操練升任撫臣慶裕履任以後照案辦理嗣因越南防務喫緊餉需支絀且查各標抽練之兵已練數年槍礮技藝漸能精熟復經調任撫臣倪文蔚前任撫臣潘鼎新先後奏明概行飭歸營汎停支練餉現在邊防營勇需餉甚繁尙待鄰省協濟若復抽練綠營加餉無從籌措惟是兵丁非練不精豈能因噎廢食當查西省綠營兵丁按月操練歷有定章平日非不訓練但須定一考察章程驗其勤惰不任稍涉懈怠自能日見精熟今擬撫標及提鎮各標營弁兵每月於常操

之外月底調集合操一次由撫臣及提鎮諸臣親臨校閱嫻習者
獎拔之生疎者責罰之合操之日哨官每員給日食銀一錢兵丁
每名給日食銀五分此項銀兩爲數無幾即由善後局籌給臣與
提臣現駐邊關未能親閱即委得力之員代閱其外協營弁兵即
責成該管官按期訓練按季遴員前往校閱一次覈其功過分別
勸懲仍於校閱之日一律發給日食以昭公溥如此認真考察使
知奮勵儆惕餉不加而兵自精倘該管官有不知振作玩忽因循
即當立予嚴參以示懲儆庶幾仰副 聖主通籌全局整飭戎行
之至意所有遵 旨飭籌續行具奏緣由理合會同兩廣總督臣
張之洞督辦邊防廣西提督臣蘇元春恭摺由驛馳陳伏乞 皇

太后 皇上聖鑒訓示謹 奏 光緒十二年四月初六日奉

旨覽奏已悉即著將留防各營認真訓練務成勁旅其綠營兵丁據稱於常操之外調集合操亦當切實辦理毋得徒託空言欽此

奏章京關朝宗在營瘴故請飭部優卹摺

光緒十二年二月初六日

奏爲遵 旨請 卹恭摺仰祈 聖鑒事竊臣等於光緒十一年

十二月十一日電 奏勘界章京工部郎中關朝宗於初十日在

廣西鎮南關營次受瘴身故懇請照例 優卹十三日恭奉電

旨關朝宗瘴故可憫照請賜卹俟奏到降旨等因欽此仰見 聖

慈矜垂勞勩無遠弗周凡在關大小員弁無不同深感泣臣等查該章京由庶常改部在總署行走多年練習勤慎此次經臣承修

奏帶來桂辦事精詳萬里閒關不辭勞瘁南關爲著名邊瘴向無村落館廨被兵不餘片瓦軍士則十生九死使臣以下結茅塚墓間毒濕歊蒸重以積屍之氣中者輒病人有戒心該員素負體強深夜辦公受病不治誠如 聖諭實可憫傷臣等時值交涉殷繁入春以後俱在病中暫未具 奏茲謹縷陳俯懇 天恩將四品銜保舉無論題選咨留郎中工部虞衡司員外郎關朝宗照軍營積勞瘴故例從優 賜卹以勵勤勞實出自 逾格鴻慈伏乞

皇太后 皇上聖鑒訓示謹 奏 光緒十二年四月初六日奉

旨關朝宗著照軍營瘴故例從優議卹該部知道欽此

奏貴縣土匪廖彩爵聚衆抗官飭營搜剿片

光緒十二年二月初六日

再潯州府屬素稱不靖之區近年雖漸就安謐而昔之漏網逸匪
尙多未獲誠恐潛匿滋事疊飭各地方官認真緝拿茲於光緒十
一年十二月初四日據署貴縣知縣裘彬稟稱查有昔年因爭產
糾黨滋事拒捕逃逸之匪徒廖彩爵潛回縣屬中屯村地方伏匿
該縣當派壯丁會同防營哨勇於十一月二十二日黎明往捕該
匪竟敢率黨迎拒放槍中傷勇目蕭亞富等八名衆寡不敵祇得
退回正擬再添勇役前往圍捕探聞該匪拒傷勇丁後添糾游匪
以圖負固中屯村距縣城一百四十里地極險僻舊有村人防賊
所築圍牆礮樓復經該匪加築安礮兵單難期得力潯郡雖有靖
邊後軍防勇一營正值冬防緊要之際已分赴桂平武宣平南等

縣巡緝未便全行調集請添派營勇至縣俾速撲除等情當經臣
飭派升用知府陳如金督帶靖邊前軍一營前往拿辦十二月二
十二日馳抵該縣而潯州府知府延昌亦酌調該府防營勇丁兩
哨同日到縣會商辦理查得該匪村四面道路紛歧山徑崎嶇且
附近之六陳六活等村多非善類不無通匪之人必須布置嚴密
當派管帶靖邊前軍參將龍殿甲督隊取道龍山等處由前路進
管帶靖邊後軍參將王化祥督隊由桐嶺後路進適值連日天雨
未能合圍本年正月初三日稍霽各軍同時出隊進逼匪巢各以
開花礮轟擊迎面礮樓匪亦以礮還擊相持逾時樓已洞穿龍殿
甲督隊直薄圍牆該匪憑牆抗拒延昌陳如金懸賞鼓勵期於必

克把總蕭宏亮汪雨露率勇拚死踰牆中賊伏礮同時陣亡並亡
勇丁十名受傷弁勇二十二名時已黃昏當即收隊初四日有匪
來犯營壘經我軍擊退陳如金與延昌會商挑選奮勇乘夜潛攻
四更時分直逼賊巢踰牆而入一齊施放火具北風正烈匪屋皆
燃賊驚慌亂竄我軍大隊接應擊以槍礮傷斃多名餘匪由山後
奔逸黑夜未能窮追匪巢礮樓圍垣俱已毀平次早查驗匪骸不
能辨認仍即分投跣緝首要各匪務獲究辦現在地方居民均甚
安謐等情由印委各員稟報前來臣查該匪負固抗拒傷斃弁勇
行同叛逆雖經即時攻克而匪首未獲餘孽未盡該處與武宣來
賓等縣境地相接山深箐密易於潛蹤除嚴飭上緊跣緝搜捕務

將首要各匪悉數殲擒毋任再有伏匿潛滋並脅從概免究治加
意安撫外理合附片陳明伏乞 聖鑒訓示謹 奏奉 旨知道
了即著嚴飭各營上緊搜捕務將首要各匪悉數殲擒毋任漏網
以靖地方欽此

奏籌議廣西邊隘移添提督鎮道並請撥的餉摺 光緒十二

年二月二十五日

奏爲遵 旨籌議廣西邊隘分營扼紮請撥的餉酌移提督駐所
另設柳州總兵並擬添設邊關道員以資分任鎮撫繪具圖說恭
摺覆陳仰祈 聖鑒事竊臣等於光緒十一年七月二十八八月
初二等日先後承准軍機大臣字寄光緒十一年七月初五日奉

上諭鎮南馬白二關爲滇桂入越邊要處所現當和議甫成越南游匪爲患關內亦多伏莽此後分界通商中外人民往來尤夥必須大枝重兵添紮要隘以戢奸宄而靖人心著岑毓英張之洞張凱嵩李秉衡悉心會商將如何添設提鎮專官確覈兵勇營數或留現在得力勝兵以充新額汰腹地無用常卒以省空糧何處總紮何處分防一切通盤籌畫繪圖貼說縷晰覆陳候旨定奪其新設各營尤須選練精實能戰能守一兵得一兵之用勿以疲弱應汰之兵濫竽充額用副朝廷慎固邊防消弭隱患之至意將此由五百里諭知岑毓英張之洞張凱嵩並傳諭李秉衡知之欽此仰見 聖主鞏固邊防精核武備之至意臣等無任欽服當即公

同詳加籌議伏查廣西南邊綿亘二千餘里原設隘所一百零九處分卡六十六處與越南之諒山高平宣光等省接壤山箐紛歧路路可通而鎮南關至龍州一路較爲寬平故曩爲中越使命商賈往來之通衢東出太平南甯西出歸順鎮安之總匯且自龍州以東河灘漸廣舟行下水直達潯梧其視全桂腹地東省上游據有建瓴之勢實爲兩粵利害所關當此款議旣成外防游匪內靖伏戎鎮南一關尤爲中外鈐轄 聖諭所謂紮要隘添重兵者無以易此惟南關固居極衝而關之中後關之左右各路均須擇要設防而後氣力不形單薄不致有腹背受敵肘腋乘虛之慮大要分爲三路鎮南關口及關以內之關前隘再近內之憑祥土州爲